

共同經課 - 1

尼西米記八章一節~三節，五節~六節，八節~十節

1 到第七月，以色列人已經倚起in許個城。彼時，百姓親像一人攏聚集佇水門前寬闊的所在，請經學士以斯拉帶摩西律法的冊來就是耶和華所曾命令以色列的。2 七月初一日，祭司以斯拉帶律法到公會前，或男或女，以及見若聽了會曉得者的面前。3 佇水門前寬闊的所在，對天光到日晝，佇眾男女、及許個會明白者的面前讀伊。百姓俯耳孔聽律法的冊。5 以斯拉倚佇眾百姓的頂面，佇眾百姓的目矚前掀開此本冊。伊一下掀開，眾百姓就攏起來倚。6 以斯拉謳唸耶和華至大的上帝；眾百姓攏抬起手應講：「阿們！阿們！」就俯頭，面向地，敬拜耶和華。8 in讀上帝律法的冊到明白，閣開拆彼個意思，互百姓明白所讀的。9 總督尼希米及做祭司的經學士以斯拉，及教示百姓的利未人，對眾百姓講：「今仔日是耶和華——恁上帝的聖日，毋通悲哀啼哭。」因為眾百姓聽見律法的話攏啼哭；10 伊閣給in講：「去啊，恁去食肥的物，飲甜的味，無備辦物的人著分互伊，因為今仔日是咱的主的聖日。恁毋通憂悶，因為對耶和華得著的歡喜是恁的能力。」

共同經課 - 2

詩篇十九篇

1 [大衛的詩，交互樂官。] 諸個天講起上帝的榮光；穹蒼報揚伊的手所做的。2 此日對彼日發出言語；此暝對彼暝傳出知識。3 無言無語，in的聲無通聽見。4 in的準繩遍佇天下，in的言語到佇地極。上帝佇in中間為著日頭安置帳房；5 日頭親像新子婿出伊的房，亦親像猛勇的人歡喜走伊的路。6 伊對天的此旁出，甦到天的彼旁，無一項物囿密，無得著伊的熱氣。7 耶和華的律法齊全，會互人的心神活起來；耶和華的干證確實，會互意人有智慧。8 耶和華的教示正直，會互人的心歡喜；耶和華的命令清潔，會互人的目矚光明。9 敬畏耶和華的道理是清氣，永遠存在；耶和華的判斷真實，一概是公義 10 ——比金，比多多好金卡通欣慕；比蜜，比蜂房滴落來的蜜卡甜。11 閣你的奴僕對諸個受警戒，守諸個有大賞賜。12 是誰會知伊的失錯啊？求你除去我暗靜的過失。13 求你阻止你的奴僕無故意犯罪，毋准彼個罪惡管轄我，我就完全，免犯大罪。14 耶和華——我的石磐，救贖我的主啊，願我的嘴所講的、心所想的佇你的面前得著接納。

共同經課 - 3

哥林多前書十二章十二節~三十一 a 節

12 因為親像身軀是一個，也有多多體；閣身軀的體雖然多，攏是一個身軀；基督也是按呢。13 因為咱眾人無論是猶太，抑是希利尼，做奴才的，抑是自由的，攏曾受洗禮佇一個神，來屬佇一個身軀，也攏總會飲一個神。14 因為身軀毋是一體，是多多體。15 設使腳若講：「我因為毋是手，我無屬身軀；」伊毋是為著按呢就無屬佇身軀。16 設使耳仔若講：「我因為毋是目矚，我無屬佇身軀；」伊毋是為著按呢就無屬佇身軀。17 設使通身軀是目矚，對叨落會聽？若攏是耳仔，對叨落會鼻？18 若是上帝照伊的所愛，將諸個體隨個安排佇身軀。19 若百體攏像一款，就身軀佇叨落？20 總是今體是多多，也身軀是一個。21 目矚袂會對手講：「我無欠用你；」頭殼也袂會對腳講：「我無欠用恁。」22 毋若按呢，身軀諸個體看做卡軟苳的，閣卡袂無得。23 閣咱看做身軀卡無貴氣的體，咱就妝飾互in卡尊貴；也卡無文雅的，咱互in閣卡文雅。24 因為咱文雅的體，無所欠缺；獨獨上帝調和身軀，佇有欠缺的益發互伊尊貴，25 免得身軀無相合，是欲互百體平平相眷顧。26 若一體受苦，百體同受苦；一體受榮光，百體同快樂。27 恁諸個是基督的身軀，隨個是做體。28 上帝所設佇教會的：一是使徒，二是先知，三是教師，閣有行權能的，閣有醫病的恩賜，幫助的，治理的，講逐樣的音語的。29 眾人豈攏是使徒嗎？攏是先知嗎？攏是教師嗎？攏行權能嗎？30 攏有醫病的恩賜嗎？攏會講逐樣的音語嗎？攏會翻譯嗎？31 恁著切切欣慕許個卡大的恩賜。我用第一好的路續指示恁。

共同經課 - 4

路加福音四章十四節~二十一節

14 耶穌佇聖神的權能，倒轉去加利利；伊的名聲遍傳佇四圍的地方。15 伊佇in的會堂教示，互眾人謳唸伊。16 耶穌到拿撒勒，就是伊長成的所在。佇安息日，照伊平常的法度入會堂，就倚啲欲讀。17 有人將先知以賽亞的冊互伊，伊就掀開，尋著彼所在記講：18 主的神臨到我，因為伊用油抹我，互我傳福音互喪鄉人；伊有差我給受掠的人講：in會得解放，給睛暝的講，in會得著閣光，來解放受壓制的人，19 宣傳主歡喜的年。20 耶穌合冊，還執事，就坐啲。佇會堂的眾人攏注目看伊。21 伊就開嘴對in講：「此個聖經的應驗，恁今仔日有聽見啦。」